

طبعة أولي

قصة لم تكتمل

١٢١

قصة لم تكتمل

١٢٢

إسراء أسامة

إسراء أسامة



إيه هو الحب !!

كثير بيسألو إيه معناه !

الحب ده شعور أو إحساس بنحس بيه إتجاه الشخص
إللي شايفين جمال الدنيا كلها فيه.. ربنا إللي بيزرع
الحب ده جوانا وهو الوحيد الللي يقدر ينزعة من
جواك .

وقد إيه هو شعور جميل وخصوصاً من شخص
ينحبه وهو بيحبنا وهو برضة أسوأ شعور لو أتحول
من أقصى اليمين لأقصى اليسار .



إسراء أسامة

٦ - ١٢

رواية

إسراء أسامة

إهداء

لكل إلهي عايش في قصة و حكاية
و شايف حياته دي تنفع رواية
و كل إلهي واقف في نقطة وثابت
و كل إلهي راح و كمل و عاند
و كل إلهي لسة في صفحة فانت
بيقرأ و يحكي لغيره الحكاياه

إسراء أسامة

تملي حبيبي بشتاقلك تملني عنيا تندهاك
ولو حوليا كل الكون بكون يا حبيبي محتاجلك

ندأ منين ، بالحب مثلاً !

إيه هو الحب ؟

الرب ده شعور أو إحساس بنحس بيه كلنا في وقت من حياتنا ، إتجاه شخص بنكون شايفين جمال الدنيا كلها فيه ، ربنا هو الوحيد اللي قادر يزرع فينا الشعور بالحب و هو الوحيد إلي قادر ينزعه من جدوره ، قد إيه هو شعور جميل و خصوصاً لو كان متبادل من طرفين كل طرف منهم شايف الطرف الثاني مكمله .

بنت ملامحها جميلة تكاد تخطف الأنظار في كل مكان بتدخله ، ضحكاتها أوسع من أبواب الفرج ، نائمة في أوضة مفهاش بصيص نور و ماسكة تليفونها و بتكتب .. هي شايفة إن المشاعر صعب تتكتب بشكل عام علي السطور ، " المشاعر تتحس و بس " ، و كعادة كل يوم صوت مرتفع من خارج الغرفة ..

- نامي يا إسراء وراكي مدرسة بكره

حاضر يا ماما ، مدرسة و قرف المدرسة و الصحيان بدري الله يخربيت التعليم في البلد دي على اللي عاوز يتعلم .

طبعاً الجزء ما بعد " ماما " كان بصوت واطي جدا ، و تقريباً المشهد ده مفيش بيت مشافهوش أو معداهش عليه .

- صباح الخير يا ماما .

صباح الهنا يا حبيبي يلا أجهزي و متنسش تاخدي
مصروفك .

- أو مال بابا فين ؟

بابا نايم عشان تعبان شوية بس مصروفك جنب الباب زي كل
يوم .

- ماشي يا ماما النهاردة المدرسة عاملة مسرحية و انا مشتركة
فيها أنا و صحابي البنات و هنقعد بعد المدرسة عشان نتمرن
ماشي .

ماشي بس متأخريش عشان بابا .

كانت إسرائ من النوع إللي الرجالة بالنسبالها كائنات لزجة و مملة
، تقريباً إسرائ كانت بذرة البنت المناضلة لحقوقها و ضد كبت
الحریات لإنها من وهي صغيرة بتعمل اللي هي مقتنعة بيه و بس ..
المدرسة كانت جميلة و مبهجة بالنسبة ليها جداً بإستثناء حصة
الفلسفة و الصحيان بدري و مدرس الرياضة الغتت ، خلص اليوم
خلاص و بدأت البروفا وفي وقت الراحة صاحبها بتكلمها علي
ولد عاوز يتعرف عليها في الفصل .

- يا بنتي ده قمور و حلو و بيحبك .

بطلّي الكلام المستفز بتاعك ده يعني عشان حلو، أحبه !! الحلاوة
شخصيته مش شكله و كمان انا مش بتاعت الحاجات دي آخر
مره تكلميني في الموضوع ده

- طيب عموما انا بوصل رسالة و خلاص إللي انتي شيفاه

خلصت اليوم و روحت البيت كالعادة ، قاعدة لوحدها بتسمع عمرو
، كانت الصدمة الأولى في حياتها لما أخوها توفي إتغيرت حياتها
١٨٠ درجة و الضحكة راحت ، و القلب من كتر البكاء مبقاش قادر
، كانت في اللحظة دي مؤمنة بالكلمة إللي كانت بتكتبها دائما ، "
الشعور يتحس صعب يتكتب في سطور " ، و كان أول مرة يدخل
الحزن قلبها و يبني له بيت و يلاقي له وطن .

هو الوقت بينسي ؟

هو بالوقت ممكن أنسى حزني على اخويا ؟

طب ربنا هيعوضني بشخص شبهه ؟

مجموعة أسئلة دائماً بتدور في ذهن إسراء بطريقة غريبة و كان
صحابها في الوقت ده مشفقين عليها ، ده أخوها ، مش خال ولا عم
.. كانت بتتأمل في وشوش الناس كل يوم و هي مروحة علي روح
أخوها و هي مركبة السماعات و مشغلة إغنياتها المفضلة " تملي
معاك " ، كانت بتعشق الهضبه بس زي ما بيتقال مين مبيعشقوش ،
في الناحية الثانية من أحداث كثير بتمر في يوم إسراء..اهلها قرروا
يعزلوا واسراء تنتقل من مدرستها و من سكنها لمكان تانى خالص

.. كانت بتحاول تتأقلم مع المكان والوضع الجديد والمدرسة الجديدة
وقدرت بسرعة تكون صداقات وعلاقتها كانت كويسة مع صاحبها
البنات ، و كان فيه ولد بيحبها ومكانش بيتكلم ، كان مؤمن بالحب ،
بس كان بيخاف يكلمها و خصوصاً أنه ميملكش شئ أكثر من كل
اللي حبوها في المدرسة ، و كالعادة على أنغام أحد الاغاني اللي
بتفرز الأدرنالين في قلوبنا و كأنها حبوب شجاعة قرر يكلمها .

- يوم ٦-١٢ -

- إزيك

مين؟؟

- مصطفى

مممم

- احم .. هي صحيح المديره هتسحب اى موبايل تلاقيه في
المدرسة وكدا !

لا مش عارفة الحقيقة

- مممم طيب

هي كانت عارفاه كويس وهو باين أنه بيحاول يكلمها بأي شكل
بالبلدي كده " بيجر ناعم " بس كانت رافضة موضوع الكلام و
الدخول في مشاكل وحوارات في السن ده ، و هو مستسلمش نهائي
، كان بيحاول يكلمها تحت أي بند ، عشان يقرب ليها و كان اوقات
يقول كلام ملوش لازمة كتير عشان تتكلم .. ويوم في الثاني في
التالت بقا فيه ود ما بين إسراء و مصطفى بطريقة غريبة ، و بدأت
أسئلة إسراء لربنا في صلاتها تلاقي ليها إجابات ، هو ممكن يكون
مصطفى ده العوض بتاع ربنا عن أخويا ؟ ، طب أديله
فرصة ولا بلاش ، مصطفى كان بيكلمها بشكل يومي و بالوقت بقا
في لغة حوار و مسافات بينهم بنقل ، كان هو مستخبي ورا جدار
لعبة صراحة أو زي ما بيسميها البعض " سؤال و جواب " عشان

يقدر يجمع معلومات عنها و يكون بينهم حوار و بدأ الكلام بنهم و
قررُوا يلعبوا صراحة ...

- علي فكره ده دورك يا إسراء بطلي نصب

ههههه حاضر .. أنت معجب بحد ؟

- اه

مين ؟

- مش هقولك

لا هتقول أمال بنلعب ليه ؟

- يوم رأس السنه هقولك إيه رأيك ؟

طب هي مين ؟ طب انا أعرفها ؟

- أتقلي و هقولك يا بنتي

إسراء قررت تعدي الموضوع و تاخدة بهزار عشان ميزعلوش من
بعض و فعلا مصطفى هزر و عدوا الموضوع و كان بيلمحلها من
بعيد جدا عشان يعرف هي هتكسفه زي الباقي ولا لا و هنا قالتله "
لو بتحبها روح كلمها و أكتب لها رسالة من قلبك طويلة عريضة
أحكي فيها كل اللي جواك و أكيد هتقدر " ، و خلص الكلام بينهم
عشان يناموا .. إسراء كانت شايفاه إنسان كويس و جدع و فعلا بدأ
مكان أخوها يتملي وخصوصاً انها كانت في أشد الحاجة للخانة دي
زي أي بنت في المرحلة العمرية اللي بتمر بيها لحد ما
إحتفالات رأس السنه بدأت و يوم ٣١ وصل ، الساعة ١٢ ، إسراء
نايمة وبتتفرج علي صور الخروجة الأخيرة مع صحباتها ، و فجأة

رسالة طويلة عريضة من مصطفى توصل ليها ، مشاعر كثير في الوقت ده دقت قلب إسرائ ، و القلب حس احاسيس كثيرة ما بين الفرحة و السعادة و الخوف ، ما بين إزاي ده كان بيحكلي عن بنت تانية و ما بين إن خانة اخوها هتعلی لمكانة حبيب ، ما بين ضحكة علي شفايفها و ما بين دمعة في عيونها بتزيدها جمال ، إزاي يا رب مصطفى في وقت قصير يدخل حياتي و يحبني و يخليني أحس إنني كمان حباه ؟ ، لكن روح البنت المناضلة ما زلت تدق علي رأسها ، و في رسالة بسيطة جدا منها لمصطفى ..

- بص مش عاوزاك تزعل مني بس انا شايفاك أخويا و صديقي و لسة بدري علي الكلام ده و بلاش نشغل بالننا و نعطل حياتنا

كان الرد ده متوقع من مصطفى و بالفعل زعل ، كان مفعول حبوب الشجاعة راح في لحظة ، و بعد ثلاث أيام بدأت الشجاعة تاخدة إنه يحاول و يقبل أنه يكون اخوها و يدخل دايرة ال friend zone عشان ميخسر هاش في الحاليتين ..

- إزيك يا إسرائ ..

و بدأ الكلام يعود بنهم من تاني ، إياً كان مسمي العلاقة كان مصطفى راضي .

- المقابلة الأولى -

كان مصطفى يحاول يشوفها بأي شكل خارج حدود المدرسة ، لكن
خانة الأخوة و الصداقة للأسف مسمحتلوش ، فقرر يتحجج بورق
الدرس عشان تنزله و يشوفها ..

- ايه كل ده ؟

شو كولاته عارف انك بتحبيها

- اه بس ده كتير أوي ليه كل ده

أنتي هنتكسفي خدي دول بتوعك و ده ورق الدرس

- لا يابني كتير انا مش هكسفاك و هاخذ واحدة عشان خاطر ك

كانت فالحظة دي حاسه إنها عايشه مشهد من مشاهد الأفلام
الرومانسية من قمة الكسوف اللي كانت حاساه و المشاعر المتلخبطة
و هنا خرج القلب و أتحرك من مكانه و قرر أنه يقتل البنت
المناضلة و يحط منوم للعقل في الأكل و فعلاً حبته ، و فجأة
الصحيان بدري إتحول لشي جميل و مبهج لأنها هتشوفه ، كانت
بتبصله من بعيد لبعيد و هو مياخدش باله و أول ما ياخذ
بتكون فرحانة و تعمل نفسها مش واخدة بالها وكانت تقعد تراقبه في
صمت من غير ما ياخذ باله .. و فضل القلب مسيطر عليها طول
الوقت .. كل ما تشوفه تحس بشعور غريب ، مُفرح لدرجة
متتوصفش ، كانوا بيقسموا يومهم بين بيتهم و بين بعض حتي
المذاكرة و في يوم قررت هي اللي تاخذ حبوب الشجاعة و تتكلم .

- أنا عاوز أقولك على حاجة لما أخويا إتوفى أنا كنت بدعي ..
بدعي كتير أوى إن ربنا يعوضنى عنه ، إن ربنا بيعتلى حد
شبهه وفاهمنى حد ميسيبنيش ويبقى معوضنى عن أخويا
وشكلك انت إللي ربنا بعثك ليا يا مصطفى عشان تعوضني ..

فالوقت ده كان دعوة مصطفى إن إسراء تحبه إستجابت ، هل فعلاً
ده وقت بداية قصة الحب بنهم ، خلاص بقا كلة بالبلدي علي
المكشوف ، هو بيحبها و معترف بالحب من أول يوم ، وهي بتحبه
و قررت تعترف ، سكت شوية مصطفى و كان رده ..

ده شرف ليا واكيد انا عملت حاجة عشان ربنا يكافئنى ويبعثك ليا
انتى هدية ربنا بعثها ليا يا اسراء

- أول فلانتين -

الحب عموماً مش محتاج عيد ولا هدايا ، كان كل يوم ما بين الإنتين هو عيد ، في المشاعر اللي كانت بينهم ، لكن قرروا يكتبوا لبعض في اليوم ده رسالة يكون أول حجر أساس لبنتين بيحبوا بعض ..

- أنا معرفش حصل أمتي الكلام ده بس انا ميعرفش اخبي حاجة جوايا مصطفى انا عاوزة اقولك ان انا بحبك بحبك بجد ..

أنتي متأكده مصطفى أنا ولا مين ؟ لحسن تكوني بتكلمي حد ثاني بالغلط؟؟

- ايوه انت

من هنا بدأت السعادة والفرحة في قلوبهم ، هو وعدها يفضل جنبها طول العمر ، و هي وعدته إنها تكون ليه و بدأوا العهد مع ربنا إن الحب ميموتش و إن جدوره هتتروي ولو بالدم عشان يعيش .. كان بينهم مواقف كتير بتثبت قد إيه مصطفى إنسان شهم و جدع و بيصون زي مثلا يوم ما عرف إنها مش مذاكرة و معهاش الكتاب ، خلال ساعات كان بيخبط علي بابها بيقولها الكتاب أهو إتفضلي ذاكري و بلاش لعب ! ، جنون المرحلة دي كان غريب ، الموضوع مش حبوب شجاعة ، الموضوع إن الحب بيدي طاقة غريبة و شجاعة غريبة تكفي إنك تعمل أي شئ يكون في بالك ، أحمد السقا مثلاً لما نط من الشلال علشان بيحب مني ذكي قد إيه كان معرض نفسه للموت أو للكسر بس المخرج مكانش قاصد أنه

يظهر قوه أحمد بالعكس ، الفكره كلها في إزاي الحب يصنع المعجزات .

العلاقات عموماً بتكون ماشية في خط سير جميل لحد ما يدق باب العلاقة كابوس الشك أو إن الثقة تبدأ تنهز ، هات باسورد الفيس و الإنستا يا مصطفى ، و أنتي كمان يا إسراء .. و كعادة كل بنت و هي التقلب في كل اللي فات إكتشفت إسراء بلاوي ، و ك ثقة مصطفى الزايدة خلته ينسى أهم حركة الراجل لازم يعملها و هو إنه يمسح الرسائل .. لكن إسراء كانت عاقلة و قالت اللي فات مات ، و خصوصاً إنه من يوم ما حبها فعلاً مكلمش ولا بنت ، و قررت هنا إنها تدخل خانة جديدة في حياته بأنها تكون زي أمه ، عشان ميخبيش عنها حاجة ..

- مصطفى متخبيش عني حاجة قولي أنا أحسن ما أعرفها من برا يا مصطفى مش عاوزة الناس تشوفك وحش..

و كان بيمر بينهم مشاكل و يتصالحوا و لكن مكانش ده بيقلق العلاقة و خصوصاً أن ده الطبيعي بين أي إثنين بيعشقوا بعض لدرجة التملك ، كان عذر مصطفى دائماً ليها لو في يوم خبي عليها حاجة أنه كان بيخاف يقولها لتزعل منه أو تاخذ علي خاطرها ف تسببه و تبعد عنه ، كان دائماً عنده شعور بالخوف إنها ممكن تسببه فجأة لو عرفت حاجة وحشة عنه ومرضيتش تسامحه ، بدأت المشاكل تكبر و بدأ فعلاً شيطان الفراق يدق باب العلاقة بينهم .

- لا متبعديش كله كوم وإنك تبعدي كوم تاني يا إسراء أنا عاوزك خليك معايا لآخر العمر .

هو بدأ يصلح من نفسه لأنه بدأ يحس بالتقصير ، بدأ يحكيها مصايبه
ومشاكله و حاجات كانت فيها بتضايق جداً منه ، بس كانت بترجع
لنقطة ، لازم أسامح كفاية إنه بيحكي و مبيخبش عني ، أزعل منه
شوية بس منكذبش علي بعض أو منحكيش ..
كأنها كانت بتقول (قضا أخف من قضا) .

مين قال إن الحب بالسن ، مين قال إن مافيش حب أصلاً ، مين قال إن الحب حرام ! ، مين قال كل ده ! .. بالعكس الحب مكتسب من كل اللي حوليك سواء من أهلك من أصحابك من حبيبك ، كلنا كنا بنحب وإحنا لسه عيال صغيرة واحنا في ابتدائي وكان بيبي أحلى حب ، فيه أشخاص ممكن تكمل الحب ده ويتجوزوا ومن غير ما يتخلوا عن بعض ، زى تيمور وشفيفة كده كانوا دايمًا خناق و مشاكل ، حد فيهم اتخلى عن التانى؟! بالعكس .. اه بيبي فيه زهق في أى علاقة وده شئ طبيعي جدا وبيخلى أى حد ينسحب من العلاقة بس فيه فرق بين إللي هيكمل واللي فعلاً إنسحب عشان زهق من أول محطة نزل وسابنا، و بالفعل ده إللي حصل بينهم .. إسرائ كانت شايفة في مصطفى الأخ والصاحب والصاحبة وكل حاجة كانت دايمًا بتقوله انت الدنيا كلها ، أنت سندي وضهري الى بتسند عليك ، كانت بتحبه ومستعدة تعمل اي حاجة عشان بيبي جنبها..

لكن باب المشاكل فضل يكبر و يوسع لحد ما يوم أكتشفت أنه كذب عليها في حاجة وإن كلام الناس و القريبين طلع صح ، وفعلاً بدأت تفكر في قرار الفراق لكن كان قلبها ميطاوعهاش ، و كان عيد ميلاده فقررت متسيبهوش في وقت هو فيه سعيد و رغم سفرها و جمال المكان إللي كانت فيه علي البحر ، كان هو اللي في بالها و جمال ضجكته وهو معاها بيمتعا أكثر بكثير من قعدتها عالبحر، و كلمته عشان ميكونش لوحده ، و كان هو شايف للمرة الثانية أنه غلط ، و لأنه الراجل الصح بيعترف بغلطة بعثها رسالة ..

- ردي عليا و متتكلميش .. أسمعيني بس

حاضر

بدأت هي تتحرك بعيد عن اللي حوليها لحد ما أتصل بيها ..

- بصي أنا عاوز أقولك إن أنا بحبك جداً ومقدرش أعيش من غيرك وامتز عيش لأن والله ما بستحمل زعلك وحقك عليا وتعالى بقا لأنك وحشتيني جدا جدا يعني..

كانت إسراء في الوقت ده متلخبطة ، طب أسامح ولا ، انا بحبه بس المشاكل زادت ، الموضوع بقا بيخوف ، ولأن القلب دائماً هو اللي بيفوز في المواقف اللي زي دي ، قالتله بحبك .. و يشاء القدر إن اليوم اللي ترجع فيه من السفر و هتتجنن و تشوفه يكون الذكرى الثانوية لأخوها ويرن جرس الحزن علي بيت أخوها اللي فقلبها ، بس كانت واثقة إن ربنا شايلها مفاجأة في اليوم ده ..

- معلىش بقا الشوكولاتة ساحت

لا عادى ولا يهملك

- إيه بقا عاملة إيه !

كويسة ..

(فيه اتوبيس كان جاى ..)

- تيجى نروح كارفور والاتوبيس جاى اهو..

ها .. ممممم..مش عارفة

- يابنتي يلا

لالالا .. عشان ماما و كمان الوقت إتأخر

كان فالوقت ده مصطفى فعلاً عاوز يقضي معاها أطول وقت ممكن

، كانت وحشاه و عاوز يتكلم معاها كثير ..

- إنتي لسه ز علانة منى !

لا

- واضح واضح إنتي مش طايقانى

لا والله بس انت عارف ز علانة ليه بس

وصلها لحد البيت وقبل ما تطلع قالها ، " بصي انا عارف انك لسه
ز علانة

منى و متز عlish ، و هتغير عشانك والله " ، بيلاً فى الكلام ، مش
عارف اقول الموضوع صعب صدقيني ، اسراء كانت واقفة
بتضحك علي شكله وهى عارفة هو عاوز يقول ايه ..

- إنتي عارفة الباقي بقا

عارفة عارفة

و كأن فعلاً العيون بتنقل الكلام بين الطرفين ، عدى الوقت و كان
لازم تطلع بيتها ، غادر مصطفى المكان و كان كل واحد فيهم
فرحان و مبيسوط بطريقة متتوصفش ، كانت بتحبه بجد من قلبها ،
و أكثر حاجة جميلة إن الحب فى الوقت ده نقي ، نضيف ، مفهوش
روتين و أهل ، مفهوش شبكة و مهر و شقة و عربية ، كل
الموضوع إثنين بيحبوا بعض و بس ..

- مبرديش عليا ليه ؟

معلش مكو نتش سامعة الموبيل

- عاوز اقولك حاجة مهمة ، أنا كلمت أختي عنك

قولتلها ايه ؟

- قولتلها إني بحبك ، بحبك أوي كمان و حاجات تانية كده مش

مهم تعرفيها .

أنت بتهزر

إنتهت المكالمة بكمية سعادة و سرور مرسومة علي وشها لا توصف ، جاب الشجاعة منين يكلم حد من أهله عني و إحنا لسه عيال ، فكرك يا بت يا إسراء هيكون نصيبك و ليكي ، و بدأت تتخيل نفسها بالفستان الأبيض علي مزيك العسيلي ، كانت فرحانه جدا لدرجة متتوصفش لكن لأن الفرحة مبتكلمش دايماً ، حصل مشكلة كبيرة بينهم خلال الفتره دي ، المرة دي مصطفى بقي هو اللي بيهدد بالفراق مش إسراء ، و بدأت الوعود تدخل في خانة التدمير ، وصل الأمر إن الطرفين يشوفوا بعض و لا كأنهم يعرفوا بعض ، إثنين مختلفين ، أغراب ، الحزن باين عليهم لكن محدش راضي ياخذ خطوة إنه يصلح ، يشوفوا بعض صدفة فدرس تبدأ الموسيقى الحزينة تخرج من قلوبهم ..

هو البعد بيقسي بجد ولا دي عبارة للناس الفاشلة اللي عاوزة تبطل تحاول ، كان مصطفى متابع سياسة " خليك مبين إنك مبسوط " ، أخرج وأتفصح و بينلها إنك تقدر تعيش من غيرها عشان متبقاش هي المسيطرة علي العلاقة ، السياسة الفاشلة لرجالة كثير للأسف ، لكن هي قررت تصالحة وتبدأ هي بالمصالحة ، كانت ردوده في الأول وحشة لأنه بدأ يحس إن السياسة دي صح و بتجيب معاها ، و كأنه لقي مفتاح هيقدر يستعمله في أي وقت .. الذكرى الثانوية الأولى بينهم قربت ، هو سابق في العناد و هي قررت تفاجئه بهدية أول مرة تنزل تشتري هدية لولد ، هتجيب إيه ؟ و هتكتب إيه ؟ ، ولا تعرف ، بس قررت إنها هتعمل حاجة جديدة رغم كل اللي فات من وقت و بعد و قسوة ، راحت و لفت و إتبهلت لحد ما قررت وقالت " هعمله برواز عليه صورته و صورة هو بيحبها مع برفيوم ونزلت تشوفه ساعة " وقعدت ساعتين بتدور على حاجة تليق عليه ، لحد ما جيه اليوم اللي هتشوفه فيه ، رأس السنة ..

- آلو مصطفى أنا نزلت أنت فين !

نزلتى ! هو أنا قولتلك تنزلى أنا لسة منزلتتش ومخلصتش اللي ورايا

- خلاص هستناك

لا روى عشان متبقيش تنزلي من غير ما أقولك

- أروح !!!! أروح إزاي .. مصطفى مش هينفع

بقولك روى مش هشوفك النهاردة..

- مش هينفع تعالى هقولك على حاجة وإمشي بالله عليك..

تمام خليكى واقفة بقا..

- تمام

خلصت المكالمة و كانت ملامحها باين عليها الزعل ، لكن قررت تخلي اليوم سعيد و إستنتت مصطفى و معاها الهدية لحد ما وصل ..

- إمسك

إي ده

- إفتحها

مش هاخذ حاجة

- لا هتاخذها أنا متعبتش كل ده علشان في الآخر متاخذهاش تبقى قلة ذوق منك جدا يعنى ، يلا إفتحها

ليه تعبتي نفسك !

- عادي بقى وانت مالك اصلا

و بدأت تحكيه معاناتها علشان تجيبه الهدية ، كانوا عمرهم ما إتصوروا مع بعض ، وإتصوروا ، ويشهد المكان و الزمان على أول صورة تجمعهم ، هى كانت مبسوطه أكثر منه حاولت كتير

تعمله أى حاجة عشان يرجع تاني ، كل يوم رسالة شكل ، متلاقيش رد حلو ، كل يوم كانت بتنام على أمل إنه هيبعتها حاجة تفرحها ولكن الأمل بيخيب ، الفترة دى بقى بخيل عليها بالكلام و الإهتمام وبكل حاجة .. مين اللي قال الوجد بيكون بالمرض ، أوقات كتير الوجد بيكون من الكلام ، من العشم ، كان كلام مصطفى يشبه السكينه التلمة اللي بتقطع في قلبها ، ردود مخيبة لكل أمل في الحصول على رد حلو منه ، كانت بتقول أحاول ، لجل الوعد ، الوعد ده شئ كبير مش هين ، كانت بتدعي في صلاتها إنهم يتصالحوا و الدعوة إتقبلت ..وكان اخر يوم في امتحاناتهم وهى خلاص كانت مسافرة ..

- ألو .. أنتي نايمة

اه خير

- إطلعيلي أنا واقف تحت

هو ده حلم و لا حقيقة ، الدعوة إتقبلت ! ، فعلاً هو .. و إتصالحوا ، العلاقة كانت متوترة بس كان فيها شئ يخلي الطرفين يكملوا ، سافرت و هي فرحانة و مبسوطة بعد ما أتصالحوا ، كانت مش مصدقة نفسها ، فرحانة و سعيدة و كانت أجازة حلوة ، كانت بتحوش فلوسها يومياً عشان تعمله مفاجأة في عيد ميلاده كبيرة ، و شعور الفرحة ملازمها في كل جنبه بتشيله من مصروفها عشان تجيب بيه الهدية ، تسهر كل ليلة تكتب رسالة له وكان الأدوار إتقلبت ، مصطفى إتحول إسرائ و إسرائ بقت مصطفى ، تسهر هي و تكتب في رسايل و تمسح علشان عاوزة

أكبر قدر من المشاعر يوصله ، يمكن يعرف قد إيه هي بتحبه
..وقررت تكلم صاحبه عشان يساعدها في المفاجأة ..

- عبدالله أسفة إنى بكلمك بس أنا عارفة إنك صاحب مصطفى
الوحيد و قريب منه و زي أخوه ، دلوقتي عيد ميلاد مصطفى
قرب و عاوزة أعمله surprise party ف ممكن تساعدني ،
بس بقولك ايه ساعدني أنا بس و أي بنت تكلمك تقولك عاوزة
تعمله حاجة أعملها بلوك.

حاضر قولى إنتي عاوزة تعمليله أيه وانا معاكي

- أنا عاوزة أعمله حاجة يفضل فاكرها طول العمر لدرجة لو
عدى الوقت و التاريخ يبقى فاكرها طول حياته يا عبدالله حتى
وإحنا مش مع بعض

إيه يا بنتى الجمال دا .. طب مبدئياً عاوزة تعمليله أيه !

- معرفش ساعدنى..

ممكن نجيبه في مكان و يروح يلاقىكى .

- أنت قديم أوي دى لو إتعملت هيبقى عادى جداً ، طب بص
سيبك من اللى هيتعمل نركز على الهدية أجيبله إيه ؟

إبعدى عن الساعات و البرفيوم تقليدى..مصطفى بيحب الخواتم
جداً

- أكيد مش هجيبله ساعة و بريفيوم علشان جيبتهاله قبل كدا ،
ومش هجيب خاتم لا ، מבحبش الولاد اللي بتلبس خواتم

بعد جدال و حوار طويل بينهم قررت إسراء إنها تجيبه هدم ،
كانت في الأول هتجيب قميص لكن طلع الموضوع صعب لأنها
معندهاش خبرة في الخامات و الأشكال ، لكن لانها عنيدة قررت
تحاول و فعلا إشتريت له القميص و معاه شورت ، و بعد إتفاقها مع
عبدالله إنها هتكذب عليه و هتقوله مش هاجي عيد الميلاد ، و لأول
مره تكذب بس و شعورها بان الكدبة حتي لو بيضة غلط ، قررت
تعملها مفاجأة ، بدأ العد التنازلي للساعة ١٢ ، و هي مازالت بتكتب
و تكتب في الرسالة عشان تضمن إن رسالتها تكون أحلى
رسالة عنده ، فرح مصطفى جداً بالرسالة لكن قرر يكمل في سياسته
، وقالها مش هقراها دلوقتي ، هي مزعلتش لأنها متفقة مع عبدالله
لسة على مفاجأة و كان هو متفق مع المكان اللي هيتقابلوا فيه ،
كانت صرفت إسراء كل اللي معاهها من فلوس ، لدرجة إن الشنطة
مكانش فيها غير عشرة جنيه ، كان القلب بيدق من الخوف و
بيرقص من الفرحة ، مشاعر متلغبطة لكن حلوة ، كل دقيقة بتعدي
بتتكتب جواها ، عبدالله وصل ومعاه مصطفى ..

- إيه ده أنتى بتعملى إيه هنا ! مش أنتى مسافرة

إسراء وهى بتقرب منه ومعاهها إسبريه الثلج : اه بس جيت

عندك مشكلة .. وبترش عليه

- فهمينى إزاي إستنى ..

وقلح النضارة عشان الاسبريه.. مش هغنيلك بقا عشان صوتى

وحش بس كل سنة وانت طيب وهابي بيرز داى يا جميل

- ازای بجد انا مش مصدق

كانت كمية الفرحة و السعادة غير طبيعية في اللحظة دي ، الفرحة
مشتركة بينهم ، زي ما قال عبدالحليم حافظ الله يرحمه " ضحك و
لعب و جد و حب " ..

- بتحوري عليا يا إسراء !! بتكدي عليا أنا يا إسراء وأنتي فين
أنا مسافرة يا مصطفى .. ماشي ماشي

اسراء بتضحك .. أعملك إيه طيب ،قولت هعملك مفاجأة
وعملتها والحمدلله

- وأنا أقول عبدالله عمال يقولى يلا بسرعة وإطلع و وقف تحت
مستني وإستغربت في إيه يا جماعة ! وأطلع الأقيكي يابنت
الذينة..

كل سنة و أنت طيب بقا يا صا صا

ودخلوا المكان وقعدوا مع بعض وعبدالله طلع وشغلوا أغاني
لمصطفى من فرحته كان بيضحك ويرقص ، قعد هو وإسراء بهدله
بعض بالاسبريه ، ويهزروا ويضحكو وكان أحلى واجمل يوم
بالنسبالهم ، ومشيووا لان والد مصطفى كان عاوزه ، مصطفى كان
عاوز يوصلها بالعربية بس هي رفضت ..

- يلا إركبي عشان أوصاك

أركب فين أنت عبيط !

- يابنتي يلا..

أنت عبيط لا طبعا مينفمش و عيب

فضل يقولها تعالي وهي رفضت خالص و مشي مصطفى و إسراء وصلت بيتها بعد يوم يتكتب في سجل علاقتهم ، يوم فرحة و سعادة متتوصفش ، و كان الحب عامل زي البطارية لازم كل فترة يتشحن و يتجدد ، حاجات بسيطة جداً ممكن تفرح و ترجع الحب ، موقف ، هدية ، رسالة ، جواب ، ضحكة ، و الأهم إن في الأساس يكونوا الإثنين بيحبوا فعلاً بعض لسوء حظ إسراء كانت الهدية علي عكس المتوقع مش مقاس مصطفى لكن هو أصر أنه ينزل معاها و يبديل الهدوم بمقاسه عشان يلبسهم و يفرح إسراء ، كانت محرجة جداً منه خصوصاً أنه أكيد لو نزل هيعرف الأسعار ، فحاولت تقنعه أنها هي اللي ترجعهم و أنه يرتاح لكن هو رفض و قرروا ينزلوا مع بعض عشان يرجعهم ..

- مصطفى هما ليه سموها غمرة كده ؟

عشان كانت بتسكر كثير

- طب ليه سموا أول عباس وآخر عباس ومفيش في نص عباس ؟

عشان كانوا بيتخانقوا فقسموا بعض لاتنين

وقعدوا علي هذا الحال للساعة ٥ ونص علي ما نزلوا ، راحوا
وغيروا الحاجة ومصطفي عرف الاسعار كلها ، ركبوا ميكروباص
عشان يروحوا ، قاعدين يغنوا و يهزروا

بدأ بيكون فيه ثقة متبادلة و مشاعر من جديد بين الطرفين لكن
ناقوس الخطر كان كل يوم بيقترب عن اليوم اللي قبله ، لو إتقدملي
عريس بعد سنة أو إثنين هيكون رد فعل مصطفى إيه ؟ .. كانت
عاوزه تسأل لكن خايفة إنه يفكر إنها إستغلالية لكن جه اليوم اللي
تسأل فيه ..

- مصطفى بقولك إيه .. هو أنا بالنسبالك إيه ؟ طب لو إتقدملي
عريس هيكون موقفك إيه ؟

مش عاوز أدكي كلمة لحاجة دلوقتي عشان مينفعش أنا لسه
صغير..

- طب أنا بالنسبالك إيه ؟

هنا مصطفى كان واقف مهزوز ، هو شخص لا يملك شئ حرفياً ،
كان متردد يقول كلمة و ميكونش قدها ، فقرر يسكت .. إسراء
إتصدمت من الموقف ، كل اللي في بالها سؤال واحد ، هو أنا
هتكسر تاني ؟ ، يا رب هو أنا هونت عليه أوي كده ، و مشيت
إسراء و كان لازم تمشي ، لإنها معرفتش تداري دموعها .

أسئلة كثيرة في بالها ، شعور بالخذلان و فقدان الأمل و الحزن ،
كانت مكسورة و بتحاول تشغل وقتها و بالها لكن بتفشل ، إثنين
يدخلوا الحرب و يخرجوا الإثنين خسرانيين ، قررت إسراء بعد فترة

إنها هتجيبه خاتم ، رغم كل المشاكل و البهدلة و إلا إنها كانت دائماً بتقول مفيش كرامة بين إثنين بيحبوا بعض ، هو مصطفى فعلاً إتحول لإنسان ثاني ، ولا إختيار إسرائ كان غلط من البداية ، و لا هو قضاء و قدر ، الخاتم وصل لمصطفى وإستغرب ردود أفعالها ، الموضوع مبقاش سياسة سيب البنت تحبك حب البنت تسييك ، الموضوع بقى أكبر من كده بكتير ..

- إسرائ أنا مش سيبتك ! ليه جيبتي الخاتم

أنا عارفة إنك سيبتني بس ده كان جزء من الهدية بتاعت عيد ميلادك و أنا مكانش معايا فلوس تكمل فقولت لما أحوش هجيبه لك

مصطفى بالنسبة لإسرائ مش مجرد شخص بتحبه ده شخص بيجري في كل شريان في جسمها ، كانه حته منها ، ممكن تستبدل سعادتها بسعادته هو .. هو وبس ، هو بالنسبالها أول حب في حياتها وعمرها ما نسيت الحب ده ولا عمرها نسيتته حتي وهو بعيد دائماً بتفكر فيه و بتفكر في سعادته ، حبل وريد السعادة أصبح مشترك بينهم ، رغم عناد أحد الطرفين ، أو بالمعنى الأضح خذلانه .. كانت دائماً بتفكر هو ده الحب ، دقيقة فرح و مليون زعل ، أو الحب ده طرف واحد بيعطي و طرف يستقبل بس ، ولا لازم الطرفين يدووا ، الوضع كان غريب ، يمكن يكون غريب عليها لأنه أول حب ، فين الوعود و الكلام الحلو اللي كان بيقوله كل يوم ، فاجأة العلاقة بقى بيسودها الجفاف ، كانت بتسمع كلام كتير يخليها تبعد عنه و تبطل تحبه سواء في صورة نصايح أو تأنيب أو بهدلة ، أقرب الناس ليها قالولها سيبيه ، لكن يظل القلب هو المحرك الأول و الأخير للإنسان ، لو حسيت بالجوع هاكل و لو حسيت بالعطش هشرب ،

ف لو حسيت إنه مبيحبنيش هسيبه ، أكيد هسيبه ، و لحد اللحظة دي مكانتش حاسة ب ده ، كانت حاسة إنها فترة و هتعدى ، رغم كمية العطاء بدون مقابل هي كانت مبسوطه و كانت بتفتكر دايماً كلمته ليها " إنتي متبعديش إنتي بالذات مش هتبعدي إنتي غير أي حد عندي " .. و كالعاده و المتوقع منهم إنهم هيرجعوا ، فعلاً رجعوا .. صفحة جديدة و إنفتحت بينهم و كان الطرفين فعلاً حابين يكملوا قصتهم للأخر ، المشكلة اللي طرأت علي العلاقة في الوقت ده مكانتش ثقة ولا حزن ولا بنات و لاحتى كذب ، كانت المشكلة في إن طعم العلاقة إتغير ، كلام مفهوش مشاعر ، بعد ما كانت كلمة بحبك كافية إنها تخلي إسراء سعيدة و فرحانة ، بقى كلام كثير مش حياة ، و هو كذلك .. إثنين عايشين حياتهم و رابطهم حبل كلام لا يمت للمشاعر بأي صلة ، لكن كانت الرضا علي الطرفين واضح ، و نرجع و نقول " قضا أخف من قضا " المهم ميفترقوش .. بدأ الطرفين يفكروا في المرحلة الجديدة و هي الجامعة ، الجامعة خلاص على الأبواب ، و باب الحرية بيتفتح يوم عن يوم ، لو كان المفروض أروح بيتي الساعة ٣ ، بقى في مساحة كبيرة ، هل ده هيكون ميزة ولا عيب ، هل هيقرب بينا و لا هيبعد ، بدأت إسراء كالعاده تجهز رسالة تفرح بيها مصطفى في بداية الجامعة فأول يوم له ..

- طب بص هحاول اكتب اي حاجة تفرحك و خلاص أينعم عارفة أن اكيد فيه واحدة من صحابك فرحوك بس عادى ، انا معرفش ليه بعمل كده و معرفش ليه بحب اشوفك مبسوط حتي لو هقعد اكتبلك لسنة قدام معرفش بستمع حقيقي لما اشوف ابتسامه خارجه منك بسببي او مش بسببي عادى بس حقيقي بفرح وبتبسط ، مبعثش عاوزاك تحبني ولا بقيت عاوزة انك ترجعلي بقيت عاوزة اعيش عشان اشوف راحتك وسعادتك

بس ، والله متسألنيش ليه بحبك الحب ده ولا ليه بحاول ابسطك
بس والله بكون مرتاحة لما بلاقيك بخير ، ووالله العظيم والله
العظيم انا مبستناش منك مقابل لا بستني منك كلمة حلوة بعد
المسح ولا بستني منك تبعثلي مسح من غير مناسبة ولا بستني
منك اي حاجة اقسم بالله مش عاوزة منك حاجة.. اه كنت
عاوزة منك تحبني تحبني وبس بس دي فشلت فيها ، عمرى
ما استنيت منك مقابل حاجة انا بعملها صدقني ، هتبدأ حياة
جديدة بكرة بتمناللك كل خير وبتمنى انك تبقي مرتاح..خلي
بالك من نفسك ولو في يوم احتاجتني هتلاقيني ، ووالله حقيقي
نفسى اعرف الناس كلها انا بحبك ازاي حتي وانت مطمئني ،
حتي وانت بارد معايا..حتي وانت جبلة ، حتي وانت بتكلم
بنات وبضايقني ، حتي وانت
مش عاوز ترجعلي ولا حبيبي .

فرحتيني جدا والله ربنا يخليكي وإن شاء الله مفيش حاجة
هتفرقنا لا الجامعة ولا الدراسة ولا أي حاجة ..

كمية أسئلة كانت بتحول إسرائ في الوقت ده منها هو لسه بيحبها ولا خلاص زهق ، هل كده خلاص مفيش أمل ، هو أحننا وصلنا لحيطه سد حاجات كتير بتدور في بالها و ضغط نفسي يكاد يدمرها من جوا ، ليه البنات بتشاركها فشي يخصصها ، كل أفعالها و كلامها حتي السئ منه ميدلش غير علي أنها بتحبه ، لكن لعدم رضاها عن الوضع قررت تقفل الصفحة و تمشي .. يمكن تكون إسرائ الوقت ده بدون قصد حاولت تتبع نفس سياسة مصطفى في البعد ، فقررت تقوله إن الوالدة شافت الكلام و زعقت و لازم منتكلمش تاني ، الكدبة الثانية في حياتها تقولها ليه ، كانت حزينة علي نفسها لأنها أتعلت حاجة مكنتش متخيلة توصلها ، كل مدى بتوصل لفعل تندم عليه لجله ، بعدت و مشيت و هو مجاش ، بس بعدها بفترة رجعت واعترفته انها كذبت لأنها مبتعرفش تكذب علي مصطفى .. هو مبقاش يحبها فعلاً ، هو مصطفى وقع من سحابة الحب الوردية علي أرض الواقع و إكتشف إن الموضوع صعب خصوصاً إن الأعمار واحدة ، هل أكتشف أن فعلاً لسه بدري و هو لا يملك سوى الحب ، ولا هو بيحبها لكن محتاج يغير سياسته دي .. كانت كل يوم تنام علي أمل إنه ممكن بيعتلها حاجة تفرحها ، مفيش! ليه مبيعتليش زي الأول ، ليه شايفني صاحبة لي وبس ليه ! .. مهما كانوا بعاد و قافلين الباب في وش بعض كان دايماً بيكون بينهم حوار ، مش شرط كل يوم أو كل أسبوع ، بس كان موجود ..

- هو انا ينفع اقولك إن انا بحبك !

اه ينفع اي الي فيها !

- طب ليه مش مع بعض ! وليه مش عاوزنا نرجع !

علشان مش ضامن نفسي يا إسراء مش عاوز أعشمك وفي
الأخر ميكونش فيه نصيب
مستعدة أستناك والله وهكون ليك وهعمل أي حاجة علشان
أخليك مبسوط .. مبسوط وبس يا مصطفى بس مشوفش حد
بيشاركني فيك

- مش هينفع يا إسراء مش عاوز يوصل بينا إننا نتعلق ببعض
لدرجة منعرفش نبعد ونشغل بعضنا ونعشم بعض أكثر من
كده

يا مصطفى والله مستعدة أعمل اللي أنت تقول عليه وهسمع
الكلام في أي حاجة هتقولي عليها وهتشوف واحدة تانية
خالص بس إرجع

- أنا بقيت أخاف من العلاقات يا اسراء بقيت أخاف أدخل في
علاقة وأتعلق وفي الآخر ننكسر ومنعرفش نكمل
حياتنا.. سيببها علي ربنا يا إسراء

لم تستطع إسراء أن تتمالك نفسها و تتظاهر القوة و ذفرت
عينها دموعاً رغماً عنها و ردت بصوت يملؤه البكاء

حاضر

عدت الأيام وهي مازالت تعبانة وموجوعة ، في حاجة بتحبتها بس بعيدة أوي عنها مش طايلاها ، و بالوقت إتحوالت لقلب فقد روحه .. " مين الغبي اللي قال إشغل وقتك هتنسى " كانت الكلمة دي آخر كلمة تقولها بعد ما جربت كل حاجة ممكن تتخيلها علشان تنساه ، شغلت كل وقتها ، ما بين اللعب و المذاكرة و الجامعة و إتحاد الطلبة و الأسرة و غيره و غيره لكن يبقى الوضع علي ما هو عليه ، و يظل الليل ستارة تخبي فيها دموعها على فراق مصطفى .. طب إيه هفضل كدا لحد أمتى ، ليه متعلقة بيه أوي كده ، عمك إيه ! ، عيشي يا اسراء لنفسك بقا وفوقى حتي وهي كانت بتتصح في نفسها كانت عاوزاه معاها كانت بردوا بتفكر فيه ، واخرتها إيه ، قالت لنفسها خالص مش هفتح موضوعنا تاني و هتتعامل عادى زى أي واحدة عنده منا من ضمن صحابه البنات.. و بدأ قانون الجذب المأمرة ، هي بتبعد و هو يقرب هي تقرب و هو بيعد ، لحد ما صحيت علي رسالة منهم ..

- إسراء

نعم

- لا خالص

لا هتقول

كنت عاوز أقولك إن أنا بحبك و عاوزنا نرجع بس بردو الدوامة دي مش عاوز ادخل نفسي فيها.. أنتي فاهماني !

- فاهماك..

بس خليكى عارفة لو حصلى حاجة إعرفى إني بحبك جدا والله
العظيم ومن قلبي

بعد الشر عليك يامتخلف ، وأنا فاهماك وخلص مقدره إلهي أنتا
بتقوله

- أنا والله بكون عاوز أقولك كلام كتير كدا بس هيبقى معناه أنا
نرجع وانا مش عاوز وهنبقى باسم المرتبطين

مين قال كده ! شايفنا بنتصل ببعض ! شايفنا نعرف حاجة عن
بعض ! بنتكلم طول الليل ! فين الي مرتبطين دول !! مفيش
الكالم ده وخلص مش عاوزنا نرجع براحتك واحنا اهو
مرتاحين الفترة دى مفيش خناق وبتكلم بس

- طيب..

سؤال.. هو ليه الشخص إلهي مبيقدرناش ولا مقدر وجودنا بنحبه
وبنتمسك بيه وبرغم من أى حاجة بنعملهاله هو مش حاسس بينا ولا
مقدر دا ! .. مصطفى من النوع الكتوم مش أى حاجة بيقولها لأي
حد ، حتي لو كانت اسراء ، مبيعرفش يقول كلام حلو مبيعرفش
يهتم الأول كان مهتم وبيقولها كل ده عشان كان فعلاً بيحبها ،
الراجل مادام بيحب مستعد يعمل أى حاجة للبننت إلهي بيحبها مستعد
يخليها أسعد واحدة يوريها الجنة علي الأرض ..
كل ده كان كلام بيدور فراسها بس إسراء كانت شايفة إن خلاص

مصطفى مبيحبهاش لأنه لو بيحبها كان هيعملها حاجات كتير اوى و رغم كل ده كان فيه جزء فقلبها فرحان لأن لسه بنهم معزه و عشره

علي فكرة مصطفى مش وحش ، لو وحش تفتكروا إسراء هتجبه الحب ده كله ! إسراء شايفة مصطفى حد عظيم ،لأنه كان فيوم فخانة أخوها ، عظيم لأن الأيام والشهور والوقت مش عارفين ينسوها مصطفى ، بيوحشها كل يوم حاجة فيه .. هو مصطفى فيه كتير يتحب وإللي يعرف مصطفى هيعرف ده ، كان حتي فقسوته حنين ، راجل وجدع جدا ، راجل فرفوش وزى ما بيقولوا الراجل الفرفوش رزق يا جماعة.. كانت تقول لنفسها العمر فيه قد إيه علشان ألاقى حد يشبه اخويا كدا.

كانت إسراء كل يوم تكتب مذكراتها و تحكي إللي جواها ، لحد ما وصلت لقرار أنها لازم تعيش حياتها و تبدأ تتعرف علي غيره حتي لو تفتح باب لغيره عشان تنساه ، و بالفعل فيوم أتصورت مع ولد بس مكنش الغرض أنها تغیظة ، كان الغرض أنها تعيش و هنا مصطفى كلمها بشكل فيه نوع من العتاب لكن تحت بند الصداقة ، و كانه خايف عليها ، فين إسراء بتاعت زمان ؟ ، لكن هي فهمته أن كل ده تمثيل و فضلوا يتكلموا تحت بند الصحاب و أتفقوا يتقابلوا يوم ، وفعلاً اتقابلوا ..

- مين أروش بنت في الجامعة ناو؟؟

انا انا

- مش اوى كدا

شكرا.. تعالى نروح مكانا بقا عشان اغسل ايدي عشان فيها
تراب ومضايقاني جدا يعني

- طول عمرك معفنة يا رائه

طب متقولش رائه عشان مقتلكش .. ياربي علي البنطلون دانا
لسا جايباه يا مصطفى والله ، أمسك الشنطة كدا والموبايل

- حد قالك إن أنا الشغالة الفليبينية بتاعتك

أه أمسك أمسك وقعدت تضحك .. بتغسل ايديها : يحصح الميا
ساعة اوى يامصطفى

- صبرني يارب

أستحمل معلش

- إفتحي موبايلك

ما أنت عارفه الباسورد هو هو

- تعالى نتصور

لا مش هتصور

- عنك ما أتصورتي أنتي تطولي

أه أطول يا بابا

- أحلفى كدا..

مش أوى يعني .. وقعدوا يضحكوا وفي نص الطريق قالتله

عاوزه

اقولك علي حاجة

- إشجيني إشجيني

مش عارفة أجيبهالك إزاي بس حاجة كدبت عليك فيها وانا

مبعرفش أكذب ولا أخبي عليك حاجة

- مميمم قولى

فاكر الولد الي قولتلك انه ابن عمتي !

- أه

هو مش أبن عمتي هو معايا في الدفعة

- مميمم منا عارف وأنتي لما قولتى مصدقتكيش وسيبتك تكلمى

وخالص

متز علش ومش هكررها تاني

- ياستي عادى

مصطفى مكنش زعلان من إسرائ من أفعالها لأنه كان شايف أن الجامعة مرحلة جديدة فحياتها و أكيد لكل مرحلة تفكير و تصرفات مجنونه ، كان كل تفكيره أنها تفضل أجمل بنت فالدنيا زي ما كان شايفها أول يوم ، مش عشانه عشان إلهي هيجبها بجد بعده إن مكنش هو ، كان نفسه تفضل محتفظة بشخصيتها ، كان بيلوم نفسه لأنه كان سبب رئيسي فالقضاء علي البنت المناضلة إلهي كانت جواها .. و مرت الأيام و الأسابيع و بيقا الوضع علي ما هو عليه ، عند نقطة صحاب و بس ، وكلام كل فين و فين ، بس كان من الصعب يكون عيد ميلاد واحد منهم و ميكونش معاه ، فكان الدور علي إسرائ ، هل مصطفى هيتحرك ليها و يقدم لها جزء ولو بسيط من إلهي كانت بتقدمة و لا سيأت إسرائ كانت طاغية .

- كل سنة و أنتي طيبة يا حبيبتى و عقبال ما أفرح بيكى يوم
فرحك يا إسرائ

و إنتي طيبة يا ماما صباح الخير عليكى

- صباح الورد يلا فوقى كده عشان خارجين كلنا نحتفل بيكى
النهاردة عيد ميلاد بنتى حبيبتى

ادا بجد .. ماشى يا حبيبتى

بدأ يوم عيد ميلادها بحاجة تفرحها من الأم و الأب ، رغم إن اليوم ناقص أعز شخصين عندها و هما أخوها و حبيبها ، لكن كان لسه فيه إمان جواها أن ربنا هيفرحها بحاجة النهاردة منه ، بدأت يومها و فعلاً كلمها ..

- كل سنة وأنتي طيبة أنا عارف انك زعلانة بس ده ميمنعش
إني أكون أول واحد يقولك كل سنة وإنتي طيبة يا أحسن
واحدة عرفتها في حياتي

رغم كل المشاكل و الخلاف و الزعل ، كان مصطفى مازال شايفها حبيبته ، هو كان خايف من النصيب و القدر ، خايف يخسر باقي عمره ، الراجل عموماً لما بيحب بيحب مره واحده ، لو خسر حبه ده بيعيش باقي عمره بحب مزيف ، و رجالة كتير تستخبي ورا كلمة عشره و مراتي و غيروا ، مصطفى كان زية زي باقي الرجالة شايف أن مفيش أنسان مبيغلطش ، كل الناس بتغلط و بيقولك برضة العفو عند المقدرة ، و يفضل مصطفى يطوف و يلف و يشوف غيرها و يرجع زي الطير إللي ميفارقش عشته ، و كل يوم نسبة نضج الطرفين بتزيد ، العقل بيكتشف حاجة جديدة فالدنيا و في العلاقات ، و القلب بيهداً ، و كأن فالوقت ده بيكون القلب نايم و المحرك الأساسي فمرحلة النضج هو العقل ، فرصتهم أنهم يرجعوا أو يدور بنهم حوار طويل بتقل يوم عن الثاني لدرجة أنها أصبحت ضئيلة جداً ، وفضل مصطفى معلق بعدهم علي شماعة الظروف و النصيب ، وده مش غلط منه بالعكس أوقات كتير كانت إسراء بتشوف ده نضج و تقول " أصلاً الموضوع مرهق " .

غريب الحب ده أوى إحنا ليه بندي فرصة لبعض نبعد ! ، ليه بندي للزعل حقه أوى لدرجة إنه يكون بنا أصلاً ياجماعة و يبوظ في علاقة كويسه ، ليه !! .. ليه البعد بيضيع لحظات وذكريات ممكن تبقي حلوة ، عيشوا اليوم بيومه ياجماعة متفكروش في المستقبل فكروا في دلوقتي محدش ضامن عمره ، أمسكو في الحاجة إللي في ايديكوا ، في ايدك حد بيحبك ، متمسك بيك ، باقى عليك ، إمسك فيه و عرفوا هو قد أيه غالي قوله أنا عاوزك ، أنا مش هلاقى زيك تاني ، العمر فيه قد ايه علشان تالقوا حد يبقي باقى عليكوا بيحبكوا كدا ؟ العمر فيه قد ايه ؟ .. وفضلت إسراء تكتب كل ليله إللي فقلبها و عقرب ساعاتها يمر ، نسبة الرجوع بتقل ، نسبة السهر بتزيد ، و تبدأ تشغل وقتها من تاني عشان تحاول تنسي ، تبعد هي شويا ، وهو يبعد شويا ومقضيها كده الأثنين ومفيش حل ولا فيه أمل أنهم يبقوا مع بعض بس هي واهمة نفسها وحاطة لنفسها أمل مستحيل ، حاطة لنفسها حاجة مش هتبقي موجودة طب هي هتفضل كدا لحد امتي ، وهتعلم ايه ؟ ، فيه كتير بنات زى اسراء كده ، بيعلقوا أنفسهم و يربطوا حبال الوريد فشخص ، و بدأت تسال نفسها طب ليه نستني من حد يحتويها ليه نستني حد يسندنا ! ، اسراء كانت معمية لدرجة مش شايفة حياتها ، هي عاوزة تكون كدا عشان مصطفى معاها .. كان لازم تبدأ تشوف حياتها حواء موجود أو لا ، حبي نفسك الأول وعيشي لنفسك متعشيش لحد ، بصي لمستقبلك علشان نفسك مش علشان حد معاكى وهو ساندك ، في أي لحظة الشخص ده ممكن يمشي فأى وقت ، هتوقفي نفسك وحياتك ! مينفعش ، حياتنا دي عاملة زى الكورة انا إللي في إيدي اشوطها فين أو لمين ، تتشاط صح واجيب جول ولا اشوطها في أي مكان وتبقي برة ، إحنا إللي متحكمين في حياتنا زي ما بيقولوا الإنسان مخير وليس مسير

.. سراء بقا شاطت حياتها لمصطفى ، موجود حياتي معاك ، مش موجود حياتي مش موجودة ودا إللي وصل ليه الأمر ، هتعمل إيه ؟ تعبت وعاوزة الشخص ده يعني عوزاه ، و كلمات أغنية عمرو " لسه كنت فبالي من مفيش " مش مفرقاها ، هي كانت نفسها يعيشوا الأيام مع بعض يخلقوا لبعض ذكريات حلوة مهما عدت سنين تفضل محفورة جواهم ، مش مهم الأيام دي حلوه أو وحشة ، مفيش حاجة فالدنيا دي كاملة ، و حتي أصعب الأوقات كانت بتكون فيها مشاعر حلوه ، كانت مؤمنه إن صفحة الجنان لسه محفرتش أسمه و أسمها ، عايشه نفيها تتجنن و كأنها هي أحمد السقا مش هو ، لكن تظل البنت فنهاية المسار قليلة الحيلة ، و تظل ملامح الحب بنهم علي هامش حياة كل واحد فيهم ، يجوز كل مواقف الخزلان إللي مرت بيها مع مصطفى ممكن تسامح فيها و تعدي لكن المراه دي كانت مش زي كل مره ، هي قررت تقوله إن فيه عريس متقدم و جاهز و شاريني و انها بتحبه و عوزاه و تشوفه هيعمل إيه ! ..

- مصطفى إزيك .. انا عاوزاك فحاجة مهمه

خير

- لا مش خير انا متقدملي عريس من طرف ماما و عاوز يخطبني اول ما أخلص سنه أولي ،

مصطفى كان ساكت ، هل كان حزين ؟ و لا مكسور لأن حبيته بتضيع

قصاد عينه ، ولا كان عارف إنها كدابة و عاوزاهم يرجعوا ؟ ، هو

قرر
يكست ..

- أنا عمرى ما كنت بالشكل إللي إنتى شايفاني بيه ده ، وعلى
العموم ربنا يوففك في حياتك وبتمنالك الخير..

كان رد صادم من مصطفى فالحقيقه ، للدرجة دي مش متمسك بيها ، فيه الوعود إللي بنهم ، فين الكلام الجميل إللي كان فأول العلاقة ، و هنا حست من ربنا إن دي رسالة ، رسالة نهايه الموضوع ، فضلوا كتير مبيتكلموش ، يشوفوا بعض (أون لاین) وكأنهم ميعرفوش بعض ، معقوله فيه واحدة خدت مكانى ؟ ، معقولة نسيني كده ، خلاص بالساهل كده ؟ ، معقولة كل حاجة انتهت ، ازای ! .. مكنتش مستوعبة إللي هو بيعمله ومكنتش عارفة تعمل إيه تاني خلاص مصطفى ضاع بين إيديها ومش هيرجع تاني كل إللي كانت بتحلمه معاه راح كل حاجة كانت عاوزة تعيشها معاه راحت .. و تظل الأحلام إحلاماً .. غريبة الدنيا دى جداً ، الحاجة الي حاببها ونفسك فيها وتبقي قدامك بس مش طايلاها إيدك ، كل حاجة خلصت بين مصطفى واسراء.. و يفضل حبل الوريد بنها و بينه الليل ، فكل ليله و هي بتحكي عنه لنفسها و تسأل مليون سؤال ملهوش إجابته غير معاه ، هي كانت شايفه أسبابه مش غلط بس أسباب ضعيفه ، ليه ميكونش مصطفى قوي زي ما بتشوف فالأفلام و يعافر عشانها .

- آخر رسالة -

لو فيه حاجة ممتنة ومبسوطة بجد مش هتكون أغلى من إللي عملتها وهي أنى أقولك بحبك يامصطفى ولو فيه حاجة أقدر أقول انها أصعب حاجة عملتها هي أنى قولتلك بحبك برده ، مكنتش معترفة بحاجة إسمها حب ولا كنت عمري أتخيل أتخط في دايرة الحب وكنت دايمًا بحط اسوار حوالين منطقة الحب دي ، ومن يوم ما أنت جيت وفاجأة وبدون مقدمات عديت السور ده لقيتني بقولك انا بحبك ، وكنت في غاية السعادة صدقني ، انا أسعد واحدة إنى عرفتك وحببتك ومش عاوزة ومش هعوز غيرك ومش هبطل أطلبك من ربنا يمكن القدر والنصيب يجمعنا من تاني بعد سنة .. سنتين .. تالته .. اربعة .. الله أعلم بس ميكونش فات الأوان وبقيت أنت مع غيري ، كنت دايمًا بقولك أنا بكون مبسوطة وأنا بكتبلك كلام زى ده وبكون في قمة البهجة والسعادة ، دلوقتي وأنا بكتبلك الكلام ده أنا أه مبسوطة بس دموعي غلبتني ومش في قمة سعادتني دلوقتي .. مشيت وسيبتني لوحدي وأنت عارف إن انا لوحدي يمكن دي الحاجة الوحيدة الي مفكرش أنى اسامحك فيها ابدا ، بس بدعيلك مستتية الأيام تجمعنا ولو حتى صدفة ، أشوفك صدفة واحدة بس ، صدفة وأنت ماشي او وأنت في مواصلاتك ، أشوف عنيك ونظرتك ليا ، مش عاوزة بيبقي بنا كلام ، بس انا حقيقي بقيت في اي مواصلة بدور عليك من وسط كل الناس إللي حواليا واقول يمكن اشوفه او ألمحه ، وكأن الأيام بتعيد نفسها ، زمان مشيت أدور علي روح أخويا ، و النهاردة علي روح حبيبي ، حابه أقولك إنك وحشتني جدا والحياة والطريق صعب من غيرك ، ومتقلقش مش حطالك أمل بس كل إللي عاوزاه اشوفك ، أشوفك وبس ومبكتبش كل ده عشان

ترجلى لا خالص ، بكتبك كل ده عشان أنت تستحق أكثر من كدا ،
انا ممتنة أنى عرفتك وحببتك يا چو حياتى ، أنت سايبلى بصمة فى
قلبى ومعلم جوايا ، ضحكتك ، ونظرتك ، والحسنة اللى فى دقنك ،
وشعرك ، ورخامتك عليا وخناقنا سوا وكل حاجة وحشتنى ،
متزعلش منى لو زعلتك فى مرة او جرحتك بكلمة ، أنا عاوزاك
بس تعرف ان أنا حببتك ، وصدقنى محدش هيجى يلمس قلبى زيك
مهما عدت السنين هفضل أفكرك .. انا معرفش اى اللى جواك ليا
ومعرفش هل فعلا بٌعدى عنك مآثر فىك ولا لا ، ومعرفش هل لسه
شعورك ناحيتى موجود ولا لا ، هل لاقيت اللى تعوض مكانى ! ،
هل إسراء لسه بتيجى فى بالك ؟ ولا بقيت تطردها من تفكيرك ؟ ..

كانت دي آخر رسالة تكتبها لمصطفى ، مشاعر متلغبطة و كلمات باين أنها طالعة من القلب ، قلب طفل متعلق بأب ، أم ، أخ .. الموضوع كان صعب عليها تخسر حربين ورا بعض ، حرب أخوها و حرب حبيبها ، لكن كانت حابة تكون النهاية سعيدة ، مش كل النهايات حزينة ، حتي الحزين منها بتكون فيها شئ من الجمال .. التعلق المرضي ده وحش وحش أوى وصعب ، صعب الإنسان يخرج منه مهما دخل في حياته اشخاص وحاولوا ، مفيش فائدة إن حد يسبيك في نص الطريق ويمشي دي واقعة وخسارة كبيرة ، من الصعب نلاقي حد يمسك فينا ويحبنا بجد ، ومن السهل جدا بردو نسييه ونمشي ، اسراء عمرها ما هتكره مصطفى ، بس مصطفى ساب جواها وجع وخلاها تحظر من الناس إللي حوالها مبقاش عندها ثقة في نفسها حتى عشان تثق في الناس ، ثقته في نفسها اتهزت ، محدش فاهم اسراء غير مصطفى حتى اهله ، هي بتاكل وبتشرب تبقي كويسة وخالص محدش عارف إيه إللي بيبقي جوة الإنسان محدش عارف إيه إللي بيدور في دماغه ، بس هل إحنا فعال فترات في حياة بعض ؟ ، طب ولو حتى فترات في حيات بعض ، ليه منسيش في حياة بعض علامة أو بصمة نفتكر بعض بيها ، أي شخص بتحبوه بتعزوه اجره عليه يا جماعة اجره عليه وعرفوا قيمته ، عرفوا قد إيه هو شخص كويس وجميل ومينفعش يتساب حسسوه بأنه غالي وإن الدنيا فانية محدش ضامن عمره .. اسراء قررت تختم مذكراتها قبل السنه الجديدة ما تدخل بمشهد كانت طول عمرها بتحلم بيه ..

- مجرد خيال -

أنا وأنت ماشين مع بعض ، بتقولى خشي جوة عشان العربيات
والدنيا ساقعة وإحنا ساقعين بس حابين الجو ومناظرنا ، حابين
شكل الشارع والسما ، قاعدين نتصور انا وأنت ، الدنيا بدأت تشتى
وصوت الهوا بدأ يظهر وأنا وإنت مع بعض ومبسوطين ، جايين
أيس كريم في عز السقعة وقد إيه مستمتعين بالجو وإللي احنا فيه ،
بقولك انا نفسي الدنيا تمطر ونجى مش عارفين بنجى ليه بس
نجى وخلص ونلعب تقولى أنت يا مجنونة ، وفاجأة الدنيا تغم
والسحاب بدأ يضم علي بعض ، وصوت السما بدأ يظهر ، أيه ده
هتطر ! معقولة ! ، وتمطر وأنا قد إيه مبسوطة وبلعب
تحتها وأنت واقف تضحك عليا وعلى شكاك واقولك أنا مبسوطة
أوى أن انا معاك .. أنا بحبك جدا .. تقولى وانت بتعلى صوتك وانا
كمان يا مجنونة وتجى معايا تحت المطرة ، وانا واقفة قصادك
وفاجأة نسكت وصوت المطرة تبقي ظاهرة ولحظة صمت تماما
وعينى في عنيك واقفين نبص لبعض وبس كأننا حاضنين بعض
بالعيون ، فترة وأحنا على هذا الحال وفاجأة اقولك أنا لو هتمنى
حاجة دلوقتى هتمنى ان اكمل حياتى كلها معاك ، وأنت بكل نظرة
حب باصلى وبس وانا شايفة في عنيك كل الكلام إالى أنت عاوز
تقوله كل كلمة وكل حرف..وفاجأة بقولك بحبك يا مصطفى

- منمتش ليه يا مصطفى

هنام أهه يا ماما

- إيه الكتاب إللي فايدك ده ؟

لا ده كنت شاريه و انا مروح من الجامعة فكونت بسلي نفسي

- طب يلا نام بقا الفجر قرب ياذن

مصطفى إضطر يكذب علي أمه و ميقولش إن الحقيقة ، إسرائ
ختمت مذكراتها بخيالها الجميل و قررت متحتفظش بيها لنفسها ،
قررت تبعتها ليه ! ..

أغلق مصطفى المذكرات و نام يفكر ، نظر للسماء ، إبتسم من شدة
الفرحة لما عرفه من مشاعر ، و حزن من قسوة قلبه ، لكن ماذا
سيحدث .. هذا هو القدر ..

الأغلب الحب مختلف من شخص للتاني للتالت ، كل واحد الحب
بالنسبالة بيتلخص فكلمة واحدة ، والواضح ما بين تجارب و
علاقات بنشوفها و بنقرأ عنها إن الحب بيكون لحظة و بندفع تمنها
كثير ، لكن هل اللحظة دي تسوى كل التعب و الإجهاد اللى إسرائ
فيه ؟ ولا ، الحب عموما زي ما قولنا فأول كلامنا و زي ما بننهيه
بانة كلمة .. فالحب هو مصطفى .

قصة لم تكتمل بعد ..